

修訂日期: 2009/04/22 發行日期: 2009/5/9

發行單位: 中華電子佛典協會 (CBETA) <http://www.cbeta.org>

資料底本: 卍新纂續藏經 Vol. 72, No. 1436

原始資料: CBETA 人工輸入, CBETA 掃瞄辨識

No. 1436-A 博山語錄集要序

佛祖之道。如金剛王寶劍。得之不易。用之不易。付之亦不易。以其皆不易也。故傳持斯道者。實鮮其人。而魚目混珠。山雞冒鳳者。嘗半天下也。我曹洞一宗。盛於唐。衰於宋。至元似復盛而實衰。其故蓋難言之也。自

元朝初雪庭裕公奉

詔住少林。天下學者。翕然宗之。歷傳至萬曆改元。小山書遷化。

詔幻休潤。補其席。四方之腰包而至者。如鳥投林。如魚赴壑。而潤公乃講習評唱為事。大失眾望。時有蘊空忠和尚。先事小山老人有年。受其密印。歸隱盱江之廩山。天下不得而物色之。壽昌先師。從其薙落。後蒙記莚。始為弘揚。既得博山來公繼之。其道遂大行於世。師苦參日久。備嘗險阻。故其言功夫為獨詳。其慧光渾圓。辨才無礙。波瀾浩蕩。莫窺涯際。故學者多望洋而退。其門庭緊密。金鑰立辯。高提祖印。不妄許可。故假雞聲韻者。不得冒渡關津。而惑亂羣聽也。余因先師遷化後。曾相依三載。雖無所得於師。然三載之中。未見其一語滲入情識。但勉以向上事。則師之有造於余也大矣。及余隱荷山。師自石鼓歸。道經建州。晤於光孝寺。師曰。壽昌塔掃也未。余曰。掃即不廢。祇是不許人知。師曰。恁麼則偷掃去也。余曰。賢祇如此。和尚又作麼生。師曰。掃即不廢。祇是不曾動著。余曰。和尚却似不曾掃。乃一咲而別。及師滅。其語錄浩繁。連編累牘。流通為難。故遐方僻壤。聞師之名。向師之化。而語錄實未嘗觸於目者有之。余自壬午秋。歸錫石鼓。乃因渾朴上人之請。僭於全錄中。擇其精要。類而合之。視全錄。僅十之三。然簡而易行。約而易致。使天下學者。即是窮之。可以見其大全。使知博山之道。其廣大深密有如此。非癡守一概者。可恍惚其萬一也。嗚呼廣陵散不復作矣。今幸其譜猶存。安得於涼風白月中。再聞斯曲乎。

肯

崇禎癸未春正月燈節日住福州鼓山湧泉禪寺傳曹洞正宗沙門元賢題於所居之嘸呻齋

語錄集要目錄

第一卷博山語錄

第二卷董巖語錄

第三卷大仰語錄

鼓山語錄

天界語錄
答問
第四卷拈古
頌古
贊
禪警語
第五卷書
文
序
疏
第六卷偈